

Friday, December 26, 2025

Time - 2:30pm - 2:35pm

AKASHVANI AIZAWL

REGIONAL NEWS BULLETIN

(MIDDAY)



CHRISTMAS FEAST

Mizote Krismas lawmna a tel ngei ngei, veng leh khaw tina kohhran hrang hrang tam berah vawiin hian Krismas ruai theh a ni ang.

Aizawlah chuan tukin zing hma takah fatu turte chhuak khawmin ran talh leh sa chan bakah tlang ruai atana eitur dangte buatsaihin vengtinah an phu suau suau a. Ruai hi vawiin tlai lamah theh tur a ni a. Niminah khan hmun thenkhatah chuan kohhran tam vak lovin Krismas ruai hi an theh tawh a, nimina theh tawh vawiina ruai nawn tur pawh an awm a. Vawiinah hian kohhran tam ber chuan ruai an theh dawn a ni. Ruai atan hian bawng, sial leh vawk an talh ber a, hetiang sa ei thei lote tan ar leh sangha te an siam bawk. Tun lai thangthar zingah sa ei lo, thlai chauh ei an tam tawh avangin thlai lam pawh chi hrang hrang an siam a ni.

Lunglei-ah pawh Krismas ruai theh tur hian zing atangin an inbuatsaih a. Lunglei a kan Corr. Thanghmingliana Renthlei hnena bawng chaw luttu ber pakhat leh Butcher Association a an hruaitu Pu H.Zairemmawia'n a hrilh danin Lunglei khawpum a Kohhran hrang hrang te hian vawi khat ruaitheh na'n hian Bawng 20-25 vel an talh ang a chhut a ni a. Bawng pakhat hi a tlangpuiin Rs nuai khat sing thum man vel a ni a ti a. Lunglei khawpui chhungah veng 23 vel a awm a, bawng manah cheng nuai 29 leh sing 9 vel senral thin anga chhut a ni a. Vawk, ar, sangha, thlai leh thil dang senso nena chhut chuan cheng nuai 60 chuang vel zen zawn senral thin a ni. Thleng leh no tawih thei lo hmang lo tura inzirtirna a nasa hle chungin ruaitheh na'n hian dispo thleng hmang an tam zawk niin a lang. Thir hmanga siam, damdawiin thleng ang deuh hmang an awm nual bawk. Damdawiin leh Police station awmna venga Kohhran lian zawkte chuan kumdang ang bawkin damlo leh Police te Masi ruai an suah a ni.



CHOLERA

Lawngtlai leh Siaha district a tuihri leng mek dinhmun chu a ngai a nih rualin Lawngtlai a Lairam Christian Medical Centre (LCMC) damdawi-inah tuihri natna kai ni ngei a hriat 1 dahluh belh a ni.

He ti hian Lairam Isua Krista Baptist Kohhran (LIKBK) enkawl LCMC damdawi-in a tuihri vei ni a rinhlelh enkawl mek chu 8 an ni ta a. Puan tawh angin tun kar chho khan tuihri vei ni a hriat mi 4 an thi a, November a mi 6 thi nen Lawngtlai district-ah mi 10 an thi tawh a ni. Tuna tuihri avanga nunna chan mi 4 leh kai tharte sample hi Zoram Medical College & Hospital-ah thawn a ni tawh a, Laboratory-a endikna hmuh dan nghah mek a ni. LCMC damdawi-ina doctor sawi danin tuihri natna kaite hi Myanmar lam nena inhne hnai, ramri vela sumdawng leh chetla vek an ni a. Tualchhungah a la darh rih lo ni-a ngaih a ni a. Myanmar lama sumdawng leh lirthei khalh lutte'n he natna hi an kai a, an chenpuite atang pawhin hri hi a darh lo ni a sawi a ni. Hetiang chiah hian Siaha district a Tipa Community Health Centre (CHC) a enkawl mek mi 6-te pawh lirthei khalh a Myanmar a bungraw

va dahtu leh sumdawng vek an nih thu Additional DC Pu Abraham Beirazi Khithie chuan a sawi.

Siaha leh Lawngtlai district thuneitute'n tuihri leng avanga Myanmar ramri an khar chu khar chhunzawm zel a la ni a. Myanmar lam atanga sumdawnga lo lut an awm hranpa loh avangin Mizoram atanga bungraw hralh tura kal dan vek an ni a. A ruka kawng danga kal an awm a nih loh chuan insumdawnna atana kawng hman pui berte chu khar tlat a ni rih. Chin state chhim lam Paletwa leh a chheh vel khua-ah tuihri hi a len avangin insumdawn tawna a Mizoram lam atanga inhnawnawihthe'n an kai tih hria-in ramri hi khar a ni a. Lawngtlai district bawrsap chuan thla 2 chhung ramri hi kharin Siaha district thuneitute chuan kum thar January thleng hi an khar phawt a ni.



DRUG-RELATED DEATHS

Kumin January thla atanga December ni 22 thleng khan Mizoramah ruihhlo vanga thi mi 111 an awm tawh.

Excise & Narcotics leh Police department-in an chhinchhiah danin kuminah hian ruihhlo vangin mi 111 an thi tawh a, mipa 94 leh hmeichhia 17 an ni. Kumina ruihhlo thihpui zat hi kum 2005 (kum 20 chhung)-a Mizorama ruihhlo avanga thi tam ber kum a ni a. A tam ber dawttu chu kum 2023 kha niin khami kum khan mi 76 an thi a ni. Kumin chhunga ruihhlo vanga thi zingah hian heroin leh damdawi dang tihpawlh vanga thi an tam ber a, heroin chauh khawih avanga thi pawh an tam hle a ni. He ti hian kum 1984-a heroin avanga Mizoram a thi mi pakhat an chhinchhiah hmasak ber atanga tun thlengin ruihhlo vanga thi hi mi 1,990 an tling tawh a. Mipa 1,747 leh hmeichhia 243 an ni tawh a ni. Nachhawkna lar tak spasmo proxyvon leh parvon spa vanga nunna chan an la tam ber a, mi 1,161 zet an ni a. He damdawi hi sorkar laipui-in siam a khap tak hnu-ah Mizoramah pawh he damdawi hmansual avanga thi an tlem chho telh telh a, kum 2017 atanga tun thlengin proxyvon leh parvon spa avanga thi an awm leh tawh lo a ni.

Tun hma khan heroin leh damdawi ruih theih dang emaw damdawi ruih theih chi hrang hrang khawih pawlh vanga thi hi an awm meuh lova. Kum 1984 leh 1998 inkar chhung khan chutiang vanga thi chu chhinchhiah an awm lo. Kum 1999 leh 2006 inkar (kum 7) chhung khan hetiang damdawi khawih pawlh vanga thi hi mi 17 an awm a. Kum 2007 atang khan an awm lo leh vang vang a, kum 2007 leh kum 2011 inkar pawh khan hetiang vanga thi hi chhinchhiah an awm lo. Kum 2012 atanga awm leh tanin kum 2013 atang phei kha chuan thihphah an tam chho ta hle a ni. Ruihhlo thihpuite hi kum 14 leh kum 57 inkar deuh vek an ni.

